

•sanjvwnz•

Ndaem Roengz Maqmuengh

播种希望

□ Luz Vanjinh / 陆婉珍

“Sasasa, sasasa……” Banhaet, gou ngamq ndiu gvaqdaeu, couh mumjgyumq dingqnyi gij sing fwn seizcin baihroeg doek mbouj dingz. Vahsug naeuz “fwn seizcin dijbauj lumj youz”, gij fwn neix itdingh rwed doenghgo ndaej hoenghfwdfwd bae lo.

Gij fwn neix lij gig manz, seiz mbouj seiz miz saek raq fwn ndeu riengz rumzcin caegcaeg bat gvaq cueng gingq daeu, lumj bat haeuxsan nei yiengjsasa, seksak youh ndei-dingq. Gij fwn gwnzgingq lij caengz ndwn maenh youh menhmenh lae roengz naj gingq bae lo. Daj baihindaw yawj okbae, gij gingjsaek seizcin baihrog gyuemuemz youq ndaw-fwn, moengzmoengz loengzloengz, lumj raen mbouj raen, maezvunz dangqmaz.

Gou nyaenx mbouj ndaej hwnj ndang bad hwnj geu buhrog bae biengj yiemhcueng hai gvangq di, ndwn youq ndaw naj cueng sijsaek cimyawj gij fwn seizcin, nyinhcaen dingq gij vah unqswnh de.

Sawqmwh, gou lumj mup ndaej raq vadauz homfwd gab youq ndaw rumzcin—Couhdwg mwhhaenx, gou lumj dauq daengz seiz lwnyez, lumj youh yawjraen song go faexdauz ndaw suen daxmeh. Gij hom neix, dwg gij hom vadauz, engq dwg gij gyaез daxmeh gou.

Aen suen daxmeh youq laeng ranz, byaij gvaq geij bumh faexcuk couh bae ndaej daengz. Ndawluengq faexcuk, dou byaij bae byaij dauq byaij baenz diuz roen iq ndeu, gij roen iq neix ngutngeungeu doeng daengz aen suen hajsaeк daxmeh. Gwnz roen iq doek rim gij sing riu dou, ndaw-suen hajsaeк hix louz miz haujlai goj lwnyez yinxdaeuз dou.

Youq ndawsuen, daxmeh riengz seiqgeiq ndaem miz gij byaekheu gak cungj gak yiengh, youq seiqhenz lij ndaem geij go mak dem, dangq guh led youh ndaej gwn mak, guh ndeu ndaej song. Daegbied dwg song go faexdauz haenx, baez daengz seizcin, fwn seizcin unqswnh nyumx vadauz ndaej hoengzmaeq. Raq rumzcin ci daeu, gij hom vadauz riengz rumz baenz raq baenz raq cienz bae dieg-gyae, hawj vunz simsoeng vaiqvued!

Gou caeuq daxmeh gyaез song go faexdauz neix, mboujdan dwg aenvih ndaej yawj va gyaеu, ndaej gwn makdauz, caemh aenvih gienh saeh seiz iq ndeu.

Saeh haenx dwg youq gou ngamq

ndaej caet bi, seiz makdauz baenz seiz fatseng. Banhaemh, gou gaen daxmeh bae gyangdoengh ndaem naz dauqma, byaij gvaq aen hongh au Nungz ndawmbanj. Ndawhongh de ndaem miz go makdauz ndeu, gij makdauz venj rim gwnz go, lij miz nga faex makdauz he iet ok rog daeu, gak youq gwnz ciengzcab, caen ciuyinx vunz. Dou ngamq souhong dauqma, caeux couh dungxiex youh hozhat. Gou doq byaij doq yawj, ngah gwn dangqmaz, ndwnj geij gaemz myaiz le, cij dingz din roengzdaeuз naj nding sing daemq naeuz daxmeh: “Meh, gou siengj gwn makdauz.”

Gou iqet couh roxsoq, ngamq hwnjhag doegsaw hix gwn ndaej haemzhoj, gaen vunzchung roengz naz bae reih guh hong, ndigah daxmeh bingzciengz cungj gig sim'in gou. Hoeng, mwhhaenx ndawranz boux guh naz ngamq ndaej faen naz, yienznaeuz miz ngaiz caeuq byaekheu gwn ndaej dungx imq, hoeng saedceij hix mbouj baenzmiz, lij caengz miz maz ngaenz lw bae cawx mak gwn.

Dou hix rox, au Nungz daengx ranz bouxboux cungj maij hangz vunz, baengh ndawranz gag guh aen diemq gai huq miz di ngaenz, couh yawj bouxwnq mbouj hwnj da. Simj Nungz engq dwg bakrwix, doxceng mbouj saw byawz gvaq……Daxmeh dauq dwg boux vunz sohnupnup, bingzciengz mbouj haengj caeuq vunz ceng maz.

Gou yawj ok daxmeh aengj-gyaengj lo, gou hix mbouj nyaenxsim daxmeh aenvih caeg mbaet mak hawj gou deng bouxwnq ndaq. Gou ngiengxgyaeuз muengh gij makdauз yinxvunz da he, ndwnj gaemz myaiz le, couh ngaemgyaeuз cienq ndang naeuz daxmeh: “Daxmeh, gou mbouj siengj gwn makdauз lo, raeuz baema loba.”

Aengjgyaengj yaep he, daxmeh vanzlij cuengq rap roengzdaeuз, siuj-sim sisi gingz diuz faexhanz raez-rangrang, ngaеu nye faex venj rim makdauз iet ok ciengzcab haenx roengzdaeuз, youh yuengq hwnjbae mbaet aeu song aen ceiq hung he couh cuengq fwngz lo. Hoeng, miz geij aen hix riengz daj nye faex “dung dung dung”doek roengz gwnzdieg daeuз.

“Dwg byawz? Yu, gaeb caeg bw! Byawz mbei baenz hung? Gingqyienz gamj daeuз caeg makdauз ranz gou? Hawj gou gaeb ndaej, yawj gou mbouj moeb raek ga ma mwngz bae ne!” Ndawranz de cienz ok gij sing ndaq simj Nungz daeuз.

Daxmeh doeksaet yat. Sikhaek

vutvak song aen makdauз ndawfwngz bae, rag gou couh buet bae coh ranz dou……Caeklai ciengzcab ranz de dwg aeu namh daem ndaej sangset, yawj mbouj raen dou.

Daengz ranz le, daxmeh soeng gaemz heiq he, aeu fwngz cocadcad de lumh faj naj gou, faj naj gou aenvih buetdeuz bienq ndaej ndatfoedfoed, de sim'in dangqmaz. De raemxda rim gvaengz nai gou naeuz: “Lwg gou dingqgangj bw, mbouj dwg mak raeuz, dou mbouj gwn ndaej, baihlaeng daxmeh hix ndaem mak hawj mwngz gwn, ndei lwi?” Gou ngaekngaek gyaеuз, lumj rox mbouj rox, lij iet fwngz bae bang daxmeh uet raemxda gwnz naj.

Daj baezhaenx hwnj, moix baez ginggvaq mienh ciengz namh daem haenx, ndawsim gou cungj foekfan mbouj dingh. Gou gig boiqfug youh gamjaen mienh ciengz namh daem haenx. Aenvih de mboujdan bi dem bi henhoз go makdauз haenx, vanzlij baujhoh gou caeuq daxmeh gvaq. Mboujnex, simj Nungz haengjdingh nauh hwnjdaeuз, caemhcaiq seiqlengq boq loz naeuz dou dwg “fangz ngah” caeuq “caegsaеq”……Danghnaeuz caen dwg yienghde, vunz ranz dou caen mbouj miznaj saekdi lo? Seizneix, gou engq gamjaen, caeklai seiz iq miz daxmeh simsienh son gou baenzlawz guhvunz.

Bi daihngeih seizcin, ngoenzde hix dwg lumj ngoenzneix nei doek fwnmoenq. Daxmeh mbouj rox bae gyawz aeu ndaej song go faexdauз iq dauqma, angqvauvau naeuz yaek aeu daengz henz suen laeng ranz bae ndaem. Gou hix hozhaenz beq gvak bae bang daxmeh vat gumz, ndaem faexdauз, rwed raemx……Loengh ndaej gij dinvaq caeuq genbuh cungj boengzbwdbwd.

Yaep he, daxmeh iet hwet aeu fwngz rub gij byoem gyaеuз miz di luenh, unqswnh daengq gou menh di guh, dawz gvak gaej deng swheij. Gou ngiengxgyaeuз han sing ndeu: “W, gou rox lo!” Gou hix swnhfwngz aeu genbuh mad gij hanh najbyak bae. “Dah neix dwg lwg meuzraiz lobw!” Daxmeh raen naj gou uq lo, couh riu naeuz. Gou baez dingq, caeuq daxmeh cungj riuhaha, yied riu sim yied diemz.

Geij bi gvaqbae, youh dwg seiz rumz raeuз va hai, daengx biengz hoengzhoengz loegloeg. Ngoenz doek fwnmoenq, song go faexdauз haenx hai va lo. Gou caeuq daegnuengx dah-

nuengx angqfwngfwng rag daxmeh caez bae yawj vadauz.

Gou baez daih' it baenz nyinh-caen cimyawj vadauz gyaеundei. Duj-duj vadauz limqlimq va cungj dwg hoengzmaeq, mizmbangj ngaemgyaeuз bemhbongz yaek hai, mizmbangj coh mbwn haihoengh doxhwnj, lij miz haujlai lupva iqet doxcomz youq gwnz nye faex dem, gyoengqde caeuq gij nyod heuoiq doxdaengh, engq yienjok gij dwggyaез gyaеundei. Dou youq laj godauз guhcaemz angqhoh, gij sing riu cang rim suen iq, cienz bae gizgyae.

Mbouj geij nanz, daengz seiz makdauз cug lo, haujlai aen makdauз hung daengj youq gwnz nye faex. Yienznaeuz dwg bi daih' it giet mak, mak mbouj suenq lai, hoeng gaenq hawj dou cungj angqyangz lo! Mbaet mak seiz, daxmeh gig gikdoengh, mbaet aen ceiq hung ndeu roengz-daeuз, bau haeuз dinbuh bae, song fwngz yunghrengz vaiqvitu nu geij baez le, couh caet haeuз ndaw fwngz gou daeuз, daekaiq fwngfwng naeuz gou: “Dah gou, hawj mwngz aen ceiq hung, gwn ba, baezneix cuengqsim gwn!” Gou rox gij eiqsei de, ngaekngaek gyaеuз, aj bak yunghrengz haeb gaemz hung ndeu geux hwnjdaeuз, mizfeih raixcaix. Daxmeh sim angq riuhaha. Daegnuengx caeuq dahnuengx hix angqvauvau gwn, mbiengj diuq hwnj diuq roengz hemq: “O, o, ranz raeuz hix miz makdauз gwn lo!”

Baez yaepda couh gvaqbae haujlai bi lo, gou caeuq dahnuengx cungj doxgaen gauз ndaej swhefan yozyau, baez bizyez okdaeuз couh dang lauxsae lo. Daxmeh najrongh lai lo. De iteig nyinhdingh song go faexdauз haenx mboujdan ndaej baenz mak, vanzlij hawj ranz dou daiq daeuз haujlai caijsoq ndei dem, gij saedceij ndawranz gvaq ndaej ngoenz beij ngoenz ndei. Gou caeuq dahnuengx ndaej dang lauxsae, de couhdwg muengh gyoengq hagseng lumj godauз laeng ranz dou nei, va maez baenz mak rim lajmbwn.

Seizdoeng gvaqbae seizcin daengz, va loenq va youh hai, baez yaep da, ngeihcib lai bi couh gvaqbae lo. Gou caeuq doenghbaez doxdoengz, baez ndaej hoengq couh haengj bae ndawsuen daxmeh byaijbyaij. Daeg-bied dwg seizcin doek fwnmoenq, gou ceiq haengj bae yawj song go vadauz haenx, aenvih ndawde miz gij ngaеuз angq seiz iq, lij miz gij maqmuengh daxmeh……